

Meilgranats e Baklava

DA NAOMI ARPAGAU

■ Igl ei ils 7 da fenadur e nus arrivein encunter sera ad ina staziun da bus bandunada. Staunclas dil viadi da 5 uras neu dalla costa croata, essan nus levet irritadas da veser nua che nus essan setschentadas. Suenter quell'aventura da bus tras uauls infinits e sur cuolms verdegonts havess ins numnadamein saviu spitgar d'arivar en in vitget alpin. Mo na, nus essan a Mostar, il pli grond marcau dalla Herzegovina, la part meridiunala dalla Bosnia.

Damai che nos maguns sgarguglian gia dalla fom, essan nus ledas da scuvierer ch'il marcau, nua che meilgranats e figs creschan sco zerlem, ha culinariamente da porscher bia. Tratgas tipicas ein per exempel las ligiongias Cevapi, ris cun legums en sosa da tomatas, numnau Djuvec ed ina sort petta da truffels, spinat ni caschiel che senumna Pita/Burek. Vitier vegn savens surviu ina sosa, u Ajvar che vegn fatga da peperonis ed oberschinas puradas, ni Kajmak, semeglient al Crème Fraîche che nus enconuschin. El marcau vegl anflan ins ina massa stans da fiera, ustrias e caffès aschia ch'ei fredda neu da mintga cantun da caffè frestg e Baklava, la tuorta da nuschs balcanesa.



FOTO NAOMI ARPAGAU

L'aua dalla Neretva ei ferdaglia. Aschi freida ch'ins sto bunamein temer per ils giuvens che seglian per in pè euros da rondund 20 meters altezia el flum. «Stari Most», bosniac per punt veglia, senumna la punt renomada che colligia la part occidentala, influenzada dils Croats cristians cun la part bosniaca digl ost ch'ei muslima. La punt hagi sanganau cura ch'ins hagi destruiu ella igl onn 1993 durent l'uiara, dian ils indigens. E daver san ins oz ch'ella era construida da maulta cotschna che ha colurau stgir il flum cura che toccherà ei curdada viaden.

Tgisà sch'ils turists sefatschentan era cul vargau dil marcau? Denton tgi vul schon s'occupar da conflicts ed uiaras da quella bial'aura en in liug nua ch'ei dat ton da guder? Per ils biars ei il sulet impurtont dad haver fatg ina fotografia dalla punt.

Era aunc suenter la rendida dil sulegl tarlischia ei da tuttas varts da vischala ed ornamentals d'iom. Il plantschiu da crap ei tut leischens, aschia che nus palandrein mo bufatg tras il marcau vegl e fermein tscheu e leu per contemplar ils numerus fazalets gags. Beingleiti entscheivan era ils muezins ad urar e completeschan cun lur vuschs l'idilla da meilgranats.

ABC da vacanzas

Romontsch

Astgel jeu haver...?
 Bien di!
 Co has? – Bien!
 Da nua eis?
 Engraziel!
 Fai aschi bien!
 Gie!
 Has fom/seid?
 in, dus, treis
 Jeu sun ...
 latg
 Miu num ei ...
 Neu!
 olivas, ovs
 pèsch, paun
 Quei ei bien!
 riebla
 sulegl
 tomata
 urezzi
 vacanzas
 zucher

Bosniac

Mogu imati...?
 Dobar dan!
 Kako si? – Dobro!
 Odakle si?
 Hvala!
 Molim!
 Da!
 Je si gladna/žedna?
 jedan, dva, tri
 Ja sam ...
 mlijeko
 Moje ime je ...
 Dođi!/Hajde!
 masline, jaje
 riba, kruh
 Je dobro!
 mrkva
 sunce
 paradajz
 oluja
 odmor
 šećer



FOTO S. GIGER

Ina notg magica cun glina cotschna

DA SILVAN E DANILO GIGER

■ Il venderdis, ils 27 da fenadur 2018 ha ei giu num da prender la camera cun objectiv e stativs e serender en in liug alzau ora. Daco? Perquei che quella sera ha la pli liunga stgiradegna dalla glina giu liug. Ella ha cuzzau 103 minutas ed ei stada in eveniment tut spezial. Ord quei motiv essan nus stai si Tegia Nova, in fetg bi liug ella Val Medel. Leu havein nus pinau tier nossas cameras e spitgau sin la glina. E

tadaaa... Cu ella ha inaga pudiu sur ils cuolms ha ei dau in spectachel tut spezial. La glina era tut cotschna. E tuttenua vesevan ins ina glisch che sclareva fetg clar sut la glina. Exact, quei era il Mars, il qual ins vesa derar inagada ad egl. Damai che la glina era en quei mument ualti stgira han ins medemamein saviu contemplar fetg bein la via da latg sur la Val Medel. La proxima stgiradegna dalla glina dat ei il 2019. Ina che cuoza denton aschi ditg sco uonn dat ei per igl onn 2123 puspei.



FOTO DANILO GIGER

... sche las sugas da las pitgas electricas èn l'unic mussament ch'i dat carstgauns.

Independent quant fitg che l'electricitad, che l'energia fatschenta ils carstgauns - il sulegl renda la saira tuttina, per speranza levar damaun danovamain, pronta da derasar nova energia, abla da far quai pli vast ed en ses intern pli ferm che l'ovra creada dals carstgauns.




FOTO F. HOBI